

**BOSTON  
PUBLIC  
LIBRARY**



# R E S P O N S E

A L'INTERROGATOIRE,  
qu'on dit auoir esté fait à vn nommé  
Iean de Poltrot soy disant sei-  
gneur de Merey, sur la  
mort du feu Duc  
de Guyse.

PAR MONSIEVR DE  
*Chastillon, Admiral de France, & autres  
nommez audit interrogatoire.*

A O R L E A N S.

M. D. L X I I.



## EPISTRE.

**P**EV de iours apres que le feu seigneur de Guyse eut esté blessé à la despou-  
 ueue deuant la ville d'Orleans, le dixhuit ieme iour du mois de Feburier  
 dernier : il s'esleua vn bruit qu'un nommé Merey auoit fait le coup à la  
 suggestion de monsieur l'Admiral qui pour lors estoit & est encores de present  
 en la ville de Caen en Normandie, Lieutenant en l'armee du Roy sous la char-  
 ge de monseigneur le Prince de Condé. Dequoy ledit seigneur Admiral ne s'es-  
 ment pas beaucoup, d'autant qu'il estimoit que ceste calomnie, ainsi que plu-  
 sieurs autres, s'esuanouiroit d'elle mesme. Mais depuis par la sollicitation d'un  
 nommé la Valette maistre de camp de la cauallerie legere sous ledit sieur de Guy-  
 se, taschant à desunir les Allemans, & mettre l'armee dudit seigneur Admiral  
 en trouble : estant semee en ladicte armee vne coppie de confession, attribuee à  
 un nommé Iean de Poltrot soy disant seigneur de Merey, & signee de la main  
 d'un nommé Maluaut Greffier, par laquelle il appert que ledit de Poltrot estant  
 examiné par la Royne mere du Roy en personne, & en la presence d'aucuns Sei-  
 gneurs Conseillers & Cheualliers de l'Ordre de sa maiesté, auroit grandement  
 chargé ledit seigneur Admiral & quelques autres seigneurs, & pareillement  
 aucuns Ministres de la parole de Dieu, d'auoir induit & attiré par paroles &  
 argent ledit Poltrot à faire ce que dessus. Ledit seigneur Admiral ayant esgard  
 à la verité & à son hōneur, & ne pouuās attribuer telle controuuee accusation  
 qu'aux ennemis du repos de ce Royaume continuans en leur mauuaise volonté  
 qui est de ruiner entierement ledit seigneur Admiral avec tous ceux qui font  
 profession de l'Euangile en les rendant odieux à tout le monde par tels artifices  
 & pratiques, na voulu faillir d'y remedier promptement. Et pour ceste cause,  
 sans auoir esgard aux ruses & fallaces des dessusdits, & se confiant en Dieu  
 & en sa bonne conscience, na fait difficulté de publier la susdite confession de  
 mot à mot, en y adioustant ses responce sur chacun article comprins en icelle.  
 Protestant deuant Dieu d'en respondre deuant tous iuges de la Chrestienté non  
 suspects, & s'offrant de maintenir son innocence, en toutes sortes raisonnables  
 & conuenables au lieu & degré qu'il tient en ce Royaume : à fin que telle ca-  
 lomnie estant desconuerte, & verité ayant surmonté mensonge, les coupables  
 soyent punis, comme le fait le requerra.

DV XXI. IOVR DE FEBVRIER  
*mil cinq cens lxij. au camp de Saint Hilaire pres de Saint  
Mesmin.*



A R D E V A N T la Roynemere du Roy, Messieurs le Cardinal de Bourbon, Duc d'Estampes, Prince de Mâtoue, Côte de Gruyeres, Seigneurs de Martigues, de Sansac, de Sipierre, de Lossé, & l'Euesque de Limoges, respectiuemēt Cōseillers du conseil priuē du Roy, & Cheualiers de son ordre presens: A esté amené lehan de Pol-

trot, soy disant sieur de Merey, natif du pays d'Angoumois, en la seigneurie d'Aubeterre, aagé de xxvi. ans ou enuiron: lequel admonnesté par ladite Dame, de declarer au vray la cause de son emprisonnement, qui la suscitē de donner le coup de pistole, dont monsieur le Duc de Guyse fut atteint & frappé ieudy dernier: quel estoit son but & intention, ou de ceux qui l'a-uoyēt induit à ce faire, & quels deniers il en a pour ce faire receuz, & espere en receuoir, a dict & cōfessé (se mettāt à genoux deuant ladite Dame & luy demandāt pardon,) ce que s'ensuit.

*Deposition ou confession.*

C'est asçauoir qu'ēuiron le mois de Iuing ou Iuillet dernier, le Prince de Condé estāt à Orleans, & le Seigneur de Soubize en sa cōpagnie, duquel il est seruiteur, il s'en alla audit Orleās.

*Responce.*

Monsieur l'Admiral respond en verité & comme deuant Dieu, qu'il ne sçait quand ledit Poltrot arriua audit Orleans, ne quand il en partit, & n'a souuenance de iamais l'auoir veu, ni en auoir ouy parler en forte quelconques, iusques au mois de Ianuier dernier, par l'occasion qui sera dite cy apres.

*Deposition.*

Auquel lieu le seigneur de Feuquieres le ieune gouverneur



de Roye, & le Capitaine Brion, s'adresserēt à luy, & luy dirent, qu'autresfois ils l'auoyent cogneu homme d'execution & entreprise, & que s'il vouloit entendre à faire vne bonne entreprise, qui tourneroit au seruice de Dieu, à l'honneur du Roy, & soulagement de son peuple, il en seroit grandement loué & estimé. Et les ayant iceluy confessant requis de se descourrir dauantage, & luy faire ouuerture de quelle entreprise ils entendoient parler, les asseurant que de sa part il seroit tousiours prest de faire vn bõ seruice au Roy: cognoissans sa bõne volõté, ils remirent à monsieur l'Admiral, & luy dirent qu'il luy feroit plus amplement entendre le propos qu'ils luy auoyent touché.

### *Responce.*

Quant au Capitaine Brion, ledit seigneur Admiral declare que iamais il ne l'ouit parler dudit Poltrot: & n'est vray semblable, que si ledit Briõ eust sceu quelque telle pratique, il s'en fust teu depuis, quand il a esté au seruice dudit sieur de Guyse, où il est mort. Et quant au seigneur de Feuquieres, ledit seigneur Admiral a bien souuenance qu'environ la fin de l'annuier dernier, & non iamais au parauāt, il luy dist, en parlant dudit Poltrot freschement arriué de Lion, qu'autresfois l'auoit cogneu homme de seruice, durant la guerre de Picardie, qui fut cause que ledit seigneur Admiral peu apres le raport dudit Feuquieres, l'employa comme tantost il sera dit. Et quant au surplus, ledit seigneur Admiral ne doute point que ledit Feuquieres ne sache tresbien respondre de ce qui est de son fait.

### *Deposition.*

Et de faict, deux ou trois iours apres, lesdits Feuquieres & Brion le presenterent audit seigneur de Chastillon Admiral, estāt logé audit Orleans pres la maison du Prince de Condé, & estoit pour lors ledit seigneur de Chastillon en vne salle basse deffous ledit logis: & apres que lesdits Feuquieres & Brion l'eurent présenté audit seigneur de Chastillon, il commāda à tous ceux qui estoient en la salle, de se retirer, ce qu'ils feirēt. Et mes-

mes lesdits Feuqueres & Brion s'en allerēt, & demeura seul avec ledit seigneur de Chastillon, qui luy demāda en telles parolles ou semblables, s'il vouloit prendre la hardiesse d'aller au camp de monsieur de Guyse (estant lors le camp du Roy, que ledit sieur de Chastillon appelloit le camp de mōsieur de Guyse, pres de Baugēcy) & que s'il entreprenoit d'aller audit camp pour l'effet qu'il luy declareroit, il feroit vn grand seruice à Dieu, au Roy, & à la Republique: & luy ayant iceluy cōfessant demandé de quelle entreprise il entēdoit parler, il luy dist que s'il vouloit entreprēdre d'aller audit camp pour tuer ledit sieur de Guyse, qui persecutoit les fideles, il feroit vn œuvre meritoire enuers Dieu & enuers les hommes. Oyant lesquels propos qui luy sembloient passer outre ses forces & puissances, il dist audit seigneur de Chastillon qu'il n'eust osé entreprendre si grande charge. Ouy laquelle responce, ledit seigneur de Chastillon ne l'en pressa dauantage, mais le pria de tenir ce propos secret, & n'en parler à personne.

### *Responce.*

Le contenu de cest article est entièrement faux & controuuē: sur lequel ledit seigneur Admiral remōstre en premier lieu qu'en toute ceste cōfession il n'est appelé que seigneur de Chastillon, qui est vn nom qu'il ne desdaigne point: mais tant y a, que cela monstre clairemēt de quelle boutique est sortie ceste confession, attendu qu'il n'est ainsi appelé en pas vn lieu de ce royaume, ni ailleurs, sinon par ceux qui pretendent par tels artifices le despouiller de l'estat & degré qui luy appartient. En second lieu ces mots, *estant lors le camp du Roy, que ledit seigneur de Chastillon appelle le camp de monsieur de Guyse pres Baugency*, montrent assez que quiconques a dicté ceste deposition à ce pauvre confessant, a esté par trop passionné pour bien sçauoir faire son mestier, & n'a tasché à autre chose qu'à ne rien obmettre qui peut changer ledit seigneur Admiral, soit qu'il fust à propos ou non. Finalement quand il est dit que ledit seigneur Admiral, pour induire ledit Poltrot, luy alleguoit qu'il feroit



vn œuvre meritoire enuers Dieu & enuers les hommes , qui est-ce qui ne voye clairement que tout ce propos a esté forgé par quelqu'un du tout ignorant de la vraye religion, de laquelle ledit seigneur Admiral fait profession ? Il deuoit doncques pour le moins entendre que c'est de la doctrine de l'Euangile, & combien elle condamne ces mots de meriter & œuvres meritoires , deuant qu'entreprendre de contrefaire le langage d'un Euangelique. Mais voila comme il en prend aux faux tefmoins, par vn iuste iugement de Dieu, afin que par leur propre bouche ils soyent conuaincus.

*Deposition.*

Et depuis ledit seigneur de Soubize partant de ladite ville d'Orleans pour s'en aller a Lyon, iceluy confessant l'accompagna, & y demeura continuellement avec luy, iusques enuiron quinze iours apres que la bataille fut donnee pres Dreux.

*Responſe.*

Ledit seigneur Admiral ne scait rien de tout cela.

*Deposition.*

Que ledit seigneur de Chaſtillon eſcriuit audit seigneur de Soubize eſtant audit lieu de Lyon, qu'il eust à luy enuoyer iceluy confessant.

*Responſe.*

Ledit seigneur Admiral a eſcrit en ce temps-la plusieurs fois à Lyon, au seigneur de Soubize, mais sur sa vie & sur son honneur il ne se trouuera que iamais il ait eſcrit qu'il luy enuoyast ledit Poltrot, lequel il ne sache auoir iamais veu ni cogneu au parauant, & ne pensoit aucunement à luy.

*Deposition.*

Et de fait, iceluy seigneur de Soubize le depeſcha pour aller par deuers ledit seigneur de Chaſtillon, & luy bailla vn paquet à porter, ſans luy cōmuniquer ce qu'il eſcriuoit audit seigneur de Chaſtillon : & eſtant arriué pres la ville de Celles en Berry en vn lieu nommé Ville-franche, il y trouua ledit seigneur de



Chastillon, auquel il presenta ledit paquet.

*Responſe.*

Le ſeigneur Admiral eſt memorarif qu'il eſt ainſi : mais tant ſ'en faut que ce fuſt pour employer ledit Poltrot au fait dont il eſt queſtion , qu'au contraire ledit ſeigneur de Soubize man- doit qu'on le luy renuoyaſt , pource qu'il eſtoit homme de ſer- uice, comme les lettres en feront foy.

*Depoſition.*

Et apres l'auoir veu, il luy commanda de l'aller attēdre au- dit Orleans, ce qu'il feit.

*Responſe.*

Ledit ſeigneur Admiral ne le renuoya point a Orleans, mais luy donna congé d'y aller, pource qu'il diſoit y auoit à faire.

*Depoſition.*

Et quelque temps apres le retour dudit ſeigneur de Chaſtil- lon audit Orleans, s'eſtant preſenté audit ſeigneur de Chaſtil- lon pour entendre ſa volonté: il luy demanda s'il luy ſouuenoit du propos qu'il luy auoit tenu l'eſté precedant: & luy ayant fait reſponce qu'il s'en ſouuenoit tresbien, mais que c'eſtoit vne choſe trop hazardeuſe, ledit ſeigneur de Chaſtillō luy diſt que s'il vouloit executer ladite entrepriſe, il feroit la choſe la plus belle & la plus honorable pour le ſeruite de Dieu & le bien de la Republique qui fut onques faite, & s'efforça de luy donner courage & hardieſſe pour executer ladite entrepriſe, dont de rechef il ſe voulut excuſer. Mais à l'inſtant ſuruint Theodore de Beſze, & vn autre Miniſtre de petite ſtature, aſſez puiſſant, portant barbe noire: leſquels luy firent pluſieurs remonſtran- ces, luy demandans s'il ſeroit pas bien-heureux de porter ſa croix en ce mōde, cōme le Seigneur l'auoit portee pour nous: & apres pluſieurs autres diſcours & paroles, luy dirent, qu'il ſe- roit le plus heureux homme de ce mōde, s'il vouloit executer l'entrepriſe dont mōſieur l'Admiral luy auoit tenu propos: par ce qu'il oſteroit vn tyran de ce monde, par lequel acte il gat-

gneroit Paradis, & s'en iroit avec les bien heureux s'il mouroit pour vne si iuste querelle. Desquelles remōstrances iceluy cōfessant se laisse persuader, & dist audit seigneur de Chastillon, qui estoit present & assistant à tous lesdits propos desdits ministres, qu'il feroit donc la volonte de Dieu, & s'en iroit au cāp dudit seigneur de Guyse, pour s'efforcer de mettre ladicte entreprise à execution, dont il fut fort loué & estimé tant par ledit seigneur de Chastillon, que lesdits Ministres, & luy dirent qu'il n'estoit pas seul qui auoit fait de telles entreprises, par ce qu'il y en auoit plusieurs autres qui auoyent entrepris semblables charges: & mesme ledit seigneur de Chastillon luy dist, qu'il y auoit plus de cinquāte autres Gentils-hommes de bon lieu, qui luy auoyent promis de mettre à effect autres semblables entreprises: & luy feit à l'instant bailler vingt escus par son argentier, pour venir au camp de Messas, ou lors estoit ledit seigneur Duc de Guyse, à fin de penser & aduiser les moyens cōme il pourroit venir à bout de ladicte entreprise.

*Responce.*

Ledit seigneur Admiral respond en verité deuant Dieu & deuant les hommes, que le susdit propos est faussemēt & malheureusement controuuē. Et d'abondant, à fin que tout le mōde sache comme il s'est porté enuers ledit seigneur de Guyse, il declare franchement que deuant ces derniers tumultes il en a sceu qui estoient deliberez de tuer ledit seigneur de Guyse, pour le mescontentement qu'ils en auoyent. Mais tant s'en faut qu'il les y ait induits ni approuuez, qu'au cōtraire il les en a desmeuz & destournez cōme peut mesme sauoir ma Dame de Guyse, laquelle il en a suffisamment aduertie en temps & lieu. Vray est que depuis le faict de Vassy, apres les armes prinſes pour maintenir l'autorité des edits du Roy, & defendre les pōures oppressez contre la violence dudit de Guyse & de ses adherans, il les a tenus & poursuyuis cōme ennemis publics de Dieu, du Roy, & du Repos de ce royaume. Mais sur sa vie & sur son hōneur, ne se trouuera qu'il ait approuuē qu'on attentast



attentast en ceste façon sur la personne d'iceluy iusques à tant qu'il a esté deuement aduertie que ledit de Guyse & le Marechal saint André, auoyent attiré certaines personnes pour tuer monsieur le Prince de Condé, luy & le seigneur d'Andelot son frere: comme ledit seigneur Admiral l'a n'agueres amplement déclaré à la Roynie deuant Paris, & depuis à mōsieur le Connestable à Orleans. Quoy voyant il confesse que depuis ce temps-la quand il a ouy dire à quelqu'un que s'il pouuoit il tueroit ledit seigneur de Guyse iusques en son camp, il ne l'en a destourné: mais sur sa vie & sur son honneur, il ne se trouuera que iamais il ait recherché, induit ni sollicité quelqu'un à ce faire, ni de paroles ni d'argent, ni par promesses, par foy, ni par autrui, directemēt ni indirectement. Et quād aux vingt escuz dont il est fait mention au precedent article, il recognoist estre vray qu'à son dernier retour à Orleans enuiron la fin de lanuier dernier, apres que le seigneur de Feuquieres luy eut dit qu'il auoit cogneu ledit Poltrot pour homme de seruice, il delibera l'employer à sçauoir des nouuelles du camp des susdits ennemis: & pour cest effect luy feit deliurer vingt escus, sans luy tenir autre langage ni propos, & sans iamais luy faire mention de tuer ou ne tuer pas ledit seigneur de Guyse. Car mesme tant s'en faut que si ledit seigneur Admiral eust eu quelque telle entreprise, il ne s'en fust voulu fier audit Poltrot, que mesmes quād il l'enuoya au cāp dudit de Guyse pource que dessus, ce ne fut sans se deffier de luy, d'autant qu'il luy sembloit qu'il faisoit les moyens d'entrer audit camp par trop faciles: comme ledit seigneur Admiral le declara au seigneur de Grammont, qui pour lors se trouua present, & toutefois ne laissa de l'enuoyer pour sçauoir des nouuelles dudit camp, en disant ces propres mots, qu'il seroit plustost essayé que nourri.

Sur ce mesme article Theodore de Besze declare en toute verité ce que s'ensuit, pour sa descharge deuant toute la Chrestienté. C'est asçauoir que voyant plusieurs animez contre ledit sieur de Guyse pour le meurtre perpetré à Vassy, il n'a tou-

tesfois iamais esté d'aduis pour lors de proceder contre ledit sieur de Guyse que par voye de iustice ordinaire: dont il appelle à tesmoins ceux qui l'ont veu & ouy parler en ce temps la. Qui fut aussi la cause pour laquelle il fut à Monceaux en la compagnie d'autres deputez par l'Eglise reformee de Paris, pour demander iustice dudit meurtre à la maiesté du Roy, à la Roine sa mere, & au feu Roy de Nauarre, les suppliâs treshumblement, de pouruoir en toute diligence aux troubles qui desia menaçoient le Royaume, & qui du depuis en sont suruenus. Et de faict, la responce qu'il pleut à la Roine luy faire, fut telle, que ceux de ladicte Eglise reformee en furent satisfaits, pour l'esperance qu'on leur donnoit qu'on feroit bonne & briefue iustice des coupables. Mais tost apres, ledit seigneur de Guyse & les siens ayans pris les armes, & les choses estant reduites en tel estat que droit & iustice n'auoyent plus de lieu: & qui plus est, les personnes du Roy & de la Roine estans traittez comme chacun sçait, il confesse auoir des lors, tant en public en ses predications, que par lettres, & de paroles, aduerti de leur deuoir, tant monseigneur le Prince de Condé, que monsieur l'Admiral, & tous autres seigneurs & gens de toute qualitez faisans profession de l'Euangile, pour les induire à maintenir par tous moyens à eux possibles, l'autorité des Edits du Roy, & l'innocence des pures opressez. Et depuis il a tousiours continué & continue encores en ceste mesme volonté: exhortant toutesfois vn chacun d'vser des armes en la plus grande modestie qu'il est possible, & de chercher apres l'honneur de Dieu, la paix sur toutes choses, pourueu qu'on ne se laisse tromper ni deceuoir: desquelles choses il prend à tesmoins tous ceux qui l'ont ouy en public & particulier, & qui en voudront dire la verité. Et au surplus, quand au seigneur de Guyse, pource qu'il l'a tousiours tenu pour le principal autheur & fauteur de ces troubles, il confesse auoir infinies fois desiré & prié Dieu, ou qu'il châgeast le cœur dudit seigneur de Guyse (ce que toutesfois il n'a iamais peu esperer) ou qu'il en deli-



uraist ce Royaume: dequoy il appelle à tesmoings tous ceux qui ont ouy ses predications & prieres, & nommement ma Dame de Ferrare sçait ce qu'il luy en a dit de bouche & de cœur, & qu'il luy en a souuent escrit. Mais il ne se trouuera que iamais il ait nommé ledit seigneur de Guyse en public, ne que iamais il ait parlé audit Poltrot en persōne, ni par autruy, ne qu'il l'ait iamais cogneu, ni eu affaire à luy de chose quelconque, tant s'en faut qu'il l'ait induit à ce faire. Dit d'auantage ledit de Besze qu'il ne se trouuera que iamais il ait attiltré aucū autre pour ce faict: auquel toutesfois il recognoist vn iuste iugement de Dieu, menaçant de semblable ou plus grande punition, tous les ennemis iurez de son saint Euangile, & qui sont causes de tant de miseres & calamitez en ce Royaume. Et pour verification de sa responce, outre ce que dessus, il prend droit sur les propres termes attribuez audit Poltrot confessant. Car Dieu merci, il n'est point si mal appris en sa charge, de si mal appliquer l'Ecriture en ce qui est la dit, de porter sa croix: & moins encor de dire que les hommes gagnent Paradis. Et pourtant renuoye tout ceste confession en la boutique dont elle est sortie, estant prest au surplus à se submettre en general & en particulier touchant tout ce qu'il a fait & dit en ceste presente guerre, à la cognoissance de tous iuges non suspects, tant en ce Royaume qu'ailleurs: en peine d'estre puny comme le plus meschant de la terre, s'il est trouué menteur ni coupable en ceste responce.

### *Deposition.*

Lesquels vingt escus il receut, & s'en vint audit camp de Meffas, ou il se presenta audit sieur Duc de Guyse: & luy dist qu'il se repentoit d'auoir porté les armes contre le Roy, & qu'il se vouloit doresnauāt rendre à luy. Ce que ledit seigneur Duc de Guyse print en bonne part, & luy dist, qu'il estoit le bien venu Et quand ledit seigneur Duc de Guyse partit dudit Meffas, pour s'en aller à Blois, iceluy confessant y alla, & retourna avec luy.

### *Responſe.*

Ledit ſeigneur Admiral croit qu'il eſt ainſi, dautant que le dit Poltrot luy ſeit ce meſme raport, non pas à Orleans, la ou il ne le vit onques puis qu'il l'enuoya audit camp pour en ſçauoir des nouuelles, mais en vn lieu appelé Neufuille, comme il ſera dit ci apres. Et ſe ſouuient ledit ſeigneur Admiral, que ledit Poltrot luy rapportant ce qu'il auoit veu & cognu audit camp, luy diſt qu'il ſ'eſtoit adreſſé pres de Meung, à vn qu'il nommoit le ſeigneur de l'Eſtang, qui l'auoit préſenté au feu ſeigneur de Guyſe.

### *Depoſition.*

Et quelques iours apres, il retourna audit Orleãs par deuers ledit ſeigneur de Chaſtillō: & ſ'eſforça de ſ'excuser enuers luy d'entreprendre vne ſi grande charge: parce que ledit ſeigneur Duc de Guyſe n'auoit accouſtumé de ſortir de ſa maiſon, ſans eſtre bien accompagné. Mais ledit ſeigneur de Chaſtillon luy renforça le courage plus que deuant: & luy diſt qu'il ſçauoit bien ce qu'il luy auoit promis: & qu'il ne falloir point qu'il vſaſt d'aucune excuſe. Et d'abondant luy fiſt faire pluſieurs remonſtrances par ledit de Beſze & l'autre Miniſtre qui luy en auoit premierement parlé, qui luy troublerent tellement l'eſprit & l'entendement, qu'il ſ'accorda à faire ce qu'ils vouldroyent. Et pour le confermer en ceſte mauuiſe opinion ledit ſeigneur de Chaſtillon luy bailla luy meſme cent eſcus ſol dedãs vn papier, pour acheter vn cheual ſi le ſien n'eſtoit aſſez bon, pour ſe ſauuer apres auoir fait le coup leſquels cent eſcus iceluy conſeſſant receut, & ſ'en vint audit camp de Meſſas, pour aduiſer les moyens de mettre à fin ladite entrepriſe.

### *Reſponſe.*

Il eſt certain que ledit Poltrot reuenant à Orleans pour faire ſon raport, n'y trouua plus ledit ſeigneur Admiral qui deſia ſ'eſtoit acheminé au voiage de Normandie: ce qui eſt ſuffiſant pour monſtrer que le reſte du précédēt article n'eſt pas moins



faux & controuué. Bien est vray que le seigneur d'Andelot ayant ouy son rapport à Orleans, l'enuoya audit seigneur Admiral son frere pour lors arriué au village de Neufuille à six à sept lieux d'Orleans, sur son-dit voiage de Normandie: & l'accompagna expressement du seigneur de Traues, par lequel il luy mandoit qu'il estoit en quelque deliberation de mettre en arrest iceluy Poltrot, pource qu'il luy sembloit faire vn rapport assez douteux & incertain. Toutesfois ledit seigneur Admiral l'ayant ouy, iugea qu'on s'en pouuoit seruir pour entēdre certaines nouuelles dudit camp: & pour cest effect luy deliura les cent escus dont est question, tant pour se mieux monter, que pour faire les diligences requises en tels aduertissemens, & luy commanda de s'adresser en son absence audit seigneur d'Andelot son frere. D'auantage ledit seigneur Admiral est bien recors maintenant, que ledit Poltrot s'aduança, luy faisant son rapport, iusques à luy dire qu'il seroit aisé de tuer ledit seigneur de Guyse. Mais ledit seigneur Admiral n'insista iamais sur ce propos, d'autant qu'il l'estimoit pour chose du tout friuole: & sur sa vie & son honneur, n'ouurit iamais la bouche pour l'inciter à l'entreprendre.

Sur ce mesme article Theodore de Besze respond, qu'il n'a souuenance d'auoir iamais veu ledit Poltrot, & ne l'a iamais cogneu, ni ne cognoist encores, tant s'en faut qu'il luy ait iamais parlé de telle entreprise.

### *Deposition.*

Et depuis ledit sieur de Guyse estant venu avec l'armee en ce lieu de saint Hilaire pres saint Mesmin, il le suiuit, ayant acheté du seigneur de la Mauuoyfiniere, vn cheual d'Espaigne audit lieu de Messas, moiennant la somme de cent escus qu'il luy bailla, avec le courtaut sur lequel il estoit monté au parauant. Et fut par quelques iours logé au chasteau de Corneil, distant de deux ou trois lieues dudit camp de saint Hilaire, differant d'executer ladite entreprise, iusques à ce qu'il vid

qu'on pressoit fort ladite ville d'Orleãs, & qu'on faisoit tous efforts de la prendre: & craignãt lors que plusieurs gens de bien qui y estoient fussent tuez & saccagez, il resolut en son esprit de tenir sa promesse. Et pour ce faire, ieudi dernier dix huit iefme de ce present mois, apres auoir disné en vne metairie distãt de demie lieue de la maison ou est logé ledit seigneur Duc de Guyse, il luy vint en intention d'executer ledit iour ladite entreprise: & de fait ledit sieur de Guyse passant la riuere de Leret pour s'en aller au Portereau, il l'accompagna & suiuit iusques audit Portereau: puis s'en retourna par le pont & village d'Oliuet, ou sont logez les Suisses, & vint attẽdre ledit sieur de Guyse au passage de ladite riuere de Leret, en intention, soit qu'il fust bien ou mal accompagné, d'executer son entreprise comme il feit: & oyant vne trompette qui sonnoit au retour dudit sieur de Guyse, quand il voulut entrer dedans le basteau pour passer l'eau, il s'approcha de la riuere: & apres que ledit sieur Duc de Guyse fut descendu en terre estant seulement accompagné d'un gentilhomme qui marchoit deuant luy, & d'un autre qui parloit à luy monté sur vn petit mulet, il le suiuit par derriere, & approchant de son dit logis en vn carrefour ou il y a plusieurs chemins tournans de costé & d'autre, il tira contre luy sa pistole, chargee de trois balles, de la longueur de six à sept pas, s'efforçant de le frapper à l'espaule, par ce qu'il pensoit qu'il fust armé par le corps: & à l'instant picqua ledit cheual d'Espagne sur lequel il estoit monté, & se sauua de vitesse, passant par plusieurs bois tailliz, & feit ceste nuit enuiron dix lieues de pais, pensant s'eslongner de la ville d'Orleans. Mais Dieu voulut qu'à l'obscurité de la nuit il se deslourna de son chemin, & se vint rẽdre iusques au village d'Oliuet dedans le corps de garde des Suisses, ou il luy fut dit par l'un desdits Suisses ces mots, H O V A R D O T. Entendant lesquels mots il cogneut que c'estoit la garde des Suisses, & se retira en arriere picquant iusques au lendemain huit à neuf heures du matin. Et cognoissant que son cheual estoit las & trauaillé, il se



logea en vne cense, ou il se reposa iusques au lendemain, qu'il y fut trouué & amené prisonnier.

*Responce.*

C'est article appartient particulièrement audit Poltrot : & pourtant on s'en rapporte à luy, louant Dieu cependant de tous ces iustes iugemens.

*Deposition.*

Et sur ce que ladicte Dame l'a enquis, si autres estoient contentans à la dicte entreprise, que ledit seigneur de Chastillon, & lesdits Ministres : A dit, qu'il ne luy en auoit esté parlé par autres personnes que par ledit seigneur de Chastillon, ledit de Besze & son compagnon : mais qu'il estime bien que le seigneur de la Rochefoucault en sçauoit quelque chose, d'autant que quand il arriua audit lieu de Villefranche pres la ville de Celle : ledit seigneur de la Rochefoucault luy faisoit bon visage, & luy dist qu'il estoit le bien venu.

*Responce.*

Ceste confession est notoirement contraire à ce qu'il a par ci deuant déclaré cõtre le seigneur de Feuquieres & le Capitaine Brion, à tort routesfois & sans cause, comme estime ledit seigneur Admiral. Et quant à ce qui concerne monsieur le Conte de la Rochefoucault, il respond en verité, que s'il auoit sceu quelque chose d'une telle entreprise, il ne le voudroit point denier : mais que iamais il n'ouit parler de telle chose auant qu'elle ait esté faite, & laisse aussi à iuger à tous hommes equitables, si la coniecture dudit confessant est bien fondée ou non : & s'il n'appert pas que ledit Poltrot ait esté plustost induit à charger ledit seigneur de la Rochefoucault en quelque maniere que ce fust, qu'à tesmoigner la pure verité.

*Deposition.*

Et quant au Prince de Condé, estant sur ce enquis, A dit, qu'il n'a iamais cogneu qu'il fust participãt de la dite entreprise, ne qu'il en sceust aucune chose, & pèse en sa cõscience qu'il

n'en sceut iamais rien. Mais au contraire, la premiere fois que ledit seigneur de Chastillon luy parla de ladite entreprise, luy demandant si c'estoit monsieur le Prince qui la faisoit faire, ledit seigneur de Chastillon luy feit response qu'il n'auoit que faire de s'enquerir dudit seigneur Prince de Condé.

### *Response.*

Ledit seigneur Admiral recognoist par cest article l'artifice de ses ennemis, taschans par tous moyens à le separer & toute ceste armee, d'auec monseigneur le Prince de Condé, Lieutenant general pour le Roy en icelle. Mais il s'asseure que telles entreprises, moyennant la grace de Dieu, retourneront sur la teste de tels calomniateurs. Au surplus il ne doute nullement, & portera tousiours tesmoignage, de l'integrité & innocence dudit seigneur Prince, non seulement en ce fait, mais aussi en tout ce qui s'est entrepris fait dit ou escrit par iceluy au faict de ceste guerre, & nie expressement la fin du susdit article, se rapportant à ce qu'il en a respondu ci dessus.

### *Deposition.*

Pareillement a déclaré qu'il ne luy en fut iamais parlé par le seigneur d'Andelot, ni le seigneur de Soubize, ains au contraire, ayant iceluy confessant fait entendre audit seigneur de Soubize les premiers propos qui luy furēt tenus par ledit Seigneur de Castillon, desquels il a ci dessus parlé, il luy dist qu'il n'y falloit aller par tel moyen, & que si Dieu vouloit punir ledit seigneur de Guyse, il le puniroit bien par autre voye, sans vser de telle maniere de faire.

### *Response.*

Ledit seigneur admiral estime que iamais ledit Poltrot ne tint tel propos audit seigneur de Soubize, duquel iamais il ne en a rien entendu: & ne doute aussi nullement de l'innocence du Seigneur d'Andelot son frere, ni de celle dudit seigneur de Soubize.

*Deposi-*



### *Deposition.*

Et a ledit confessant aduertí ladite Dame de se tenir sur ses gardes, par ce que depuis que la bataille a esté donnée pres la ville de Dreux, ledit seigneur de Chastillon, ensemble tous les Capitaines & soldats estans avec luy, luy portent mauuaise volonté, disans qu'elle les a trahis, par ce qu'elle leur auoir promis deuant Paris beaucoup de choses, qu'elle ne leur auoit pas tenus.

### *Responce.*

Ledit seigneur Admiral dit que cest aduertissement ne peut estre parti que d'un esprit maling, qui ne desire autre chose que la continuation des presentes miseres & calamitez de ce Royaume: & pour preuue de sa fidelité il ne peut alleguer meilleurs tesmoings que la Roynie mesmes, avec les seruices qu'il a faits par ci deuant, protestant deuât Dieu, que moyennant la grace d'iceluy, nul mauuais traictemēt ne luy a iamais fait, ni ne fera oublier le deuoir qu'il a à leurs maiestez, & à sa patrie, & ne doute nullement que l'intention des Seigneurs, Capitaines & autres de ceste armee ne soit semblable.

### *Deposition.*

Adioustant qu'il y auoit plusieurs personnages tant à la suite de la Cour, qu'à la suite de ce camp, qui estoient enuoyez par ledit seigneur de Chastillon pour executer pareilles & semblables entreprises: toutesfois n'a ouy nommer les personnages que ledit seigneur de Chastillon vouloit faire tuer: mais seulement en general luy a ouy dire, qu'apres que ledit seigneur Duc de Guise seroit tué, il feroit faire le semblable à tous ceux qui voudroyent successiuelement commander à l'armee: & aussi qu'il falloit faire mourir six ou sept Cheualliers de l'Ordre, sans autrement les nommer, sinon qu'il a entendu tout communément des Capitaines & Soldats estans audit Orleans,

qu'ils hayoyent fort monseigneur le Duc de Montpensier, & le sieur de Sanfac: & que si ledit sieur de Guyse estoit tué, ensemble lesdits Cheualliers auxquels ils portoyent mauuaise volonté, ils viendroyent puis apres se soubmettre sous la bonne grace du Roy, & feroient ce qu'il leur commanderoit.

### *Responce.*

Ledit seigneur Admiral respond à cest article comme au precedent, laissant à iuger à toutes personnes qui le cognoissent, s'il est vray semblable que cas aduenant qu'il eust fait telles entreprises, il les eust descouuertes à vn homme de telle qualité que ledit Poltrot. Et quant à ce qu'il dit auoir ouy des Capitaines & soldats, ledit seigneur Admiral n'en doit respondre, & n'en croit rien aussi, veu mesmemēt qu'il n'y a si grande occasion ni apparence de hayne contre ceux qui sont nommez audit article.

### *Deposition.*

A dit d'auantage, qu'estant en ladite ville de Blois avec ledit seigneur de Guyse, pendant que le camp estoit audit Messas, il trouua dedās les iardins dudit Blois, pres le Roy qui lors iouoit au palemaille, vn homme de moyenne taille, ayant barbe rousse, portant chausses rouges, & vn colet de cuir dechiqueté, qui auoit la pistole bandee en la main, lequel autresfois il auoit veu audit Orleans, en la salle dudit seigneur de Chastillon.

### *Responce.*

Ledit seigneur Admiral ne scait ce que ledit Poltrot a peu voir a Blois, & n'en doit aussi respondre: mais il scait tresbien que luy & toute son armee portent selon leur deuoir vne singuliere affection, obeissance & reuerence à sa maiesté, comme ses vrais & loyaux subiets & seruiteurs, & qu'ils n'ont chose de ce monde en si grande recommandation que la prosperité & grandeur d'icelle.



### *Deposition.*

Et outre, qu'il a veu en ce camp quatre personnages bien montez, qu'il n'a peu autrement nommer : mais en les voyant il les recognoistra, lesquels estoient en la salle dudit Seigneur de Chastillon quand il parla à luy la dernière fois, & luy demanda iceluy seigneur de Chastillon, s'il vouloit se faire cognoistre ausdits personnages, lesquels luy auoient promis d'exécuter d'autres entreprises : mais iceluy confessant craignant d'estre descouuert, pria iceluy seigneur de Chastillon de ne le descouurer enuers eux. Et a dit qu'en luy donnant liberté de se pourmener par ce camp, il espere les monstrier & enseigner.

### *Response.*

Ledit seigneur Admiral dit que ceste calomnie & fausseté a esté forgée en vn mesme boutique que les autres, & que pour en auoir cognoissance certaine, il falloit laisser pourmener ledit Poltrot avec bonne & seure garde.

### *Deposition.*

Enquis ce que ledit seigneur de Chastillon partât d'Orléans pour aller au pais de Normãdie auoit entrepris de faire & exécuter : a dit qu'il auoit entrepris de s'aller ioindre avec les Anglois, & les amener audit lieu d'Orléans : & qu'il promit à son parlement audit seigneur d'Andelot son frere, que si ledit seigneur Duc de Guyse s'efforçoit de venir assieger ladite ville d'Orléans, il viendroît à son secours, & s'efforceroit de luy donner vne bataille.

### *Response.*

Ledit seigneur Admiral respond que ses ennemis cherchãs si curieusement tous moyens de le ruiner sous couleur & pre-texte de iustice, deuoient plustost s'enquerir de ces choses par quelques autres de son conseil, que par ledit Poltrot, ou par

autres de telle qualité : ioint que ledit Poltrot n'estoit à Orleãs quãd ledit seigneur Admiral en partit, au moins qu'il l'ait sceu, & pourtant ne scauroit tesmoigner que par ouir dire de ce qu'il auoit promis au seigneur d'Andelot son frere. Et dit d'auantage ledit seigneur Admiral, qu'il ne se trouuera qu'il ait iamais fait., & aimeroit mieux mourir que de vouloir penser à faire entreprise contraire au deuoir d'un vray & loyal suiet & seruiteur de sa maiesté: comme il le monstrera toutesfois & quantes qu'il sera besoing.

### *Deposition.*

D'auantage enquis de la forme de la mort du feu Mareschal de saint André, & en quelle maniere il auoit esté tué, à dit, qu'il ouit dire audit Orleans à plusieurs Gentils-hommes, que d'autant que ledit seigneur Mareschal de saint André auoit premierement donné sa foy à vn ieune Gentil-homme, qui est de haute stature, portant vne petite barbe blonde ou rousse, & depuis pour la secõde fois il auoit donné sadite foy au Prince de Portian, ledit Gentil-homme auquel il auoit premieremēt donné sa foy, le tua, & luy donna vn coup de pistole: & plus n'a dit, & a signé à la minute.

Le xxii. iefme desdits mois & an, ces presentes confessions le iour d'hier faites par ledit lehan de Poltrot, par deuant la Royne & les seigneurs du conseil & Cheualliers de l'Ordre du Roy, ont esté releuës & repetees audit Poltrot, ausquelles sont confessions, apres sermēt par luy fait, il a persisté, disant qu'elles contiennent verité, & en tesmoing de ce a signé en chacun cun fueillet à la minute. Ainsi signé P. Mauluant.

### *Responſe.*

Si ledit de Poltrot, ou pour crainte de la mort, ou par autre subornation a persisté en les confessions fausses & cōtrouuees, à plus forte raison ledit seigneur Admiral & ceux qui par icelles sont chargez avec luy, persistent en leurs responſes qui con-



tiennēt la pure & simple verité. Et d'autant que la verification de tout ce fait, depend de la confrontation dudit Poltrot, ledit seigneur Admiral, avec les deffusdits, apres avoir recusé les Cours de Parlemēs, & tous autres Iuges qui se sont manifestemēt declarez leurs ennemis en ses presens tumultes, supplient treshumblement sa maiesté ordonner que ledit Poltrot soit bien & seurement gardé, en lieu ou il ne puisse estre intimidé ni suborné, iusques à tant que Dieu ottroye la paix tant desirée & necessaire en ce Royaume, & que par ce moyen le tout puisse estre verifié & vuidé par deuant Iuges non suspects. Et cas aduenant qu'aucuns desdits Iuges de Parlemēs ou autres, vueillent desmaintenant proceder au iugement & execution dudit Poltrot, & par ce moyen oster audit seigneur Admiral & à tous autres, le vray moyen de se iustifier des susdictes fausses accusations, ils protestent de leur integrité, innocence & bonne reputation, contre les deffusdits Iuges & contre tous ceux qu'il appartiendra.

Fait à Caen en Normandie ce douziesme de Mars, l'an mil cinq cens soixante & deux.

Ainsi signé,

Chastillon.

La Rochefoucaut.

Th. de Besze.

COPIE DES LETTRES EN-  
*uoyees à la Royne par ledit Seigneur Admiral,*  
*avec la sudite responce.*

**M**A D A M E, depuis deux iours j'ay veu vn interrogatoire qui a esté fait à vn nommé Iean de Poltrot, soy disant seigneur de Mercy du x x i. iesme du mois passé lequel confesse auoit blessé monsieur de Guyse, par lequel aussi il me charge de l'auoir sollicité, ou plustost pressé de faire ce

qu'il a fait : & pource que la chose du mōde que ie craindroye  
autant, ce seroit que ledit Poltrot fust executé, que premiere-  
ment la verité de ce fait ne fust bien cogneue, ie supplie tres-  
humblement vostre Maiesté commander qu'il soit bien gar-  
dé. Et cependant, i'ay dressé quelques articles sur chacun des  
siens, qui me semblent meriter responce, que i'enuoye à vostre  
Maiesté par ce Trompette : par lesquels toutes personnes de  
bon iugement pourront à plus pres estre esclairsis de ce qui  
en est. Et outre cela ie di qu'il ne se trouuera point que i'aye  
iamais recherché cestuy la, ni autre pour faire vn tel acte. Au  
contraire i'ay tousiours empesché de tout mon pouuoir que  
telles entreprises ne se missent a execution. Et de cela en ay-ie  
plusieurs fois tenu propos à mōsieur le Cardinal de Lorraine,  
& à ma Dame de Guyse & mesmes à vostre Maiesté : laquelle  
se peut souuenir combien i'ay esté contrariant à cela, reserué  
depuis cinq ou six mois en ça, que ie n'ay pas fort contesté cō-  
tre ceux qui monstroyent auoir telle volonté. Et ce a esté de-  
puis qu'il est venu des personnes que ie nommeray quand il  
fera temps, qui disoyent auoir esté praticquez pour me venir  
tuer, comme il plaira à vostre-dite Maiesté se souuenir, que ie  
luy dits à Paris en sortant du Moulin ou se faisoit le Parlemēt:  
ce que i'ay aussi dit à monsieur le Connestable, & neantmoins  
puis ie dire avecques verité que de moy-mesme ie n'ay iamais  
recherché, sollicité, ni praticqué personne pour tel effet. Et  
m'en rapporteroye bien à tous ceux qui ont veu mettre telles  
entreprises en auant deuant moy, combien ie m'en suis moc-  
qué. Et pour n'ennuyer vostre Maiesté de plus lōgue lettre, ie  
la suplieray encores vn coup treshumblement commander  
que ledit Poltrot soit bien & songneusement gardé pour veri-  
fier de ce faict ce qui en est. Aussi qu'estant mené à Paris, com-  
me l'on m'a dit, ie craindroye que ceux de la Cour de Parle-  
ment le vousissent faire executer, pour me laisser ceste calom-  
nie & imposture : ou bien qu'ils vousissent proceder à l'encon-  
tre de moy pour ce fait, ce qu'ils ne peuuent faire estans mes



parties, & recusez comme ils sont. Et cependant ne pensez pas que ce que i'en di, soit pour regret que i'aye à la mort de monsieur de Guyse : car i'estime que ce soit le plus grand bien qui pouuoit aduenir à ce Royaume & à l'Eglise de Dieu, & particulièrement à moy & à toute ma maison : & aussi que s'il plaist à vostre Maiesté, ce sera le moyē pour mettre ce Royaume en repos. Ce que tous ceux de ceste armee desirons bien vous faire entendre, s'il vous plaist nous donner seureté de ce faire, fuyuāt ce que nous vous auōs fait requerir, aussi tost que nous auons esté aduertis de la mort dudit sieur de Guyse. Ma Dame ie prie Dieu vous dōner en tresparfaite, santé tresheureuse & treslongue vie. De Caen ce xii. iésme de Mars, 1562.

F I N.


















listerra00coli

